

10 MEDIDAS URXENTES CONTRA A CRISE E A POBREZA

POLÍTICAS PÚBLICAS E SALARIOS DIGNOS



Confederación Intersindical Galega

Atravesamos unha crítica situación económica e social que semella non ter remate. Vivimos unha grave carestía da vida, xa presente desde antes da guerra pero agravada desde o seu inicio, e que está acelerando o aumento da pobreza da clase traballadora.

A inflación non para de subir, os prezos da electricidade e dos combustíbeis non baixan e moitos produtos de primeira necesidade están a prezos desorbitados.

Confírmanse -como xa advertiramos no seu día- a insuficiencia das medidas do chamado Plan de Resposta Económica á Guerra e as graves consecuencias das nulas actuacións do Goberno galego, ás que se suma a aprobación dun duro paquete de reformas para satisfacer as inxustas e fortes exixencias da UE e poder acceder a uns envelenados fondos europeos que nos están a hipotecar para o futuro.

Responder a unha situación como a que temos manténdose na disciplina neoliberal, fai aumentar a desigualdade social e a pobreza no conxunto da sociedade, ao tempo que hai máis acumulación de riqueza en menos mans, axudando así a crear as condicións para que a dereita e o fascismo medren.

Cómpre reaccionar e dar resposta, como a CIG vén facendo desde hai meses, fronte a quen pretende que a clase traballadora galega sexa quen pague, máis unha vez, esta nova crise, como pasou coas crises anteriores.

Non temos alternativa, temos que xerar dinámicas mobilizadoras máis intensas e máis extensas para facer fronte a esta situación.

Estamos chamados e chamadas ao conflito ante a patronal, na negociación colectiva, e ante os Gobernos galego e central, para que nos próximos orzamentos se aproben medidas de intervención pública na economía e nos sectores estratéxicos (financeiro, enerxético, etc.). Un verdadeiro Plan de Choque urxente para frear os efectos devastadores dos altos prezos e para afrontar unha saída galega xusta da crise.

Estas 10 medidas urxentes que reclamamos desde a CIG reafirman o paquete de propostas para a recuperación económica, a industrialización e a creación de emprego digno na nosa Terra que a central nacionalista formulou no seu momento e trasladou ao Goberno español, á Xunta de Galiza e aos grupos parlamentares (o documento íntegro pódese consultar en <https://www.cig.gal/propostas-saida-crise.html>).

Tamén dan continuidade ás medidas que a CIG xa propuxo o pasado mes de marzo diante do incremento da carestía da vida e as consecuencias da guerra (documento que se pode consultar en <https://i.gal/propostascarestia>).

10 MEDIDAS URXENTES DA CIG FRONTE Á CRISE

1.- ELECTRICIDADE

- Creación dunha **Tarifa Eléctrica Especial** que **fixe o prezo de referencia entre os 10 €/MWh e os 60 €/MWh** para quen teña potencia contratada igual ou inferior a 15 kW.

- **Implantar a Tarifa Eléctrica Galega** mediante a eliminación do pagamento da peaxe de transporte e aplicando unha redución do 10% da tarifa mensual a quen teña o seu domicilio en Galiza, tendo en conta o carácter produtor e exportador de enerxía que ten o noso país.

- **Limpar a factura dos cargos** sen relación directa co funcionamento do sistema (fomento das enerxías renovábeis, custos extrapeninsulares, déficit de tarifa, etc.), así como os derivados da chamada “excepción ibérica” recollidos no Real Decreto. Todos estes custos serán asumidos polos Orzamentos Xerais do Estado.

- **Eliminación do mercado marxinalista.** Cada tecnoloxía de xeración eléctrica cobrarase segundo custos recoñecidos auditados pola CNMC, que inclúan unha marxe de beneficio non superior ao 7%. *Red Eléctrica* determinará que tecnoloxías funcionan en cada momento.

- Crear unha **Empresa Pública Galega de Electricidade.**

- **Fiscalizar as concesións hidroeléctricas. Reverter as instalacións hidroeléctricas ao sector público,** destinando os beneficios da produción a abaratar o custo da electricidade.

- Aplicar a tarifa o **tipo mínimo do IVE (4%)** e eliminar o **imposto á xeración (7%)** que as empresas produtoras repercuten nos recibos.

- Exixir **compromisos industriais, de emprego e de participación pública** para as empresas que opten á concesión de instalacións de produción de enerxía renovábel, que deberán ser adjudicadas a través dunha concesión administrativa e non dunha autorización.

- Crear e pór en funcionamento en Galiza (As Pontes) o **Centro para a Competitividade e a I+D+i no Almacenamento de Enerxía.**

2.- SALARIOS E PENSÍONS DIGNAS

- Os incrementos salariais deberán situarse nos **1.226 euros/ano lineais** (87 euros/mes en 14 pagas) e un **incremento salarial do 4,50%.**

- Incluír en todos os convenios a **cláusula de revisión salarial con carácter retroactivo** conforme o IPC interanual acumulado.

- Aprobar as medidas necesarias para que as **auditorías retributivas e os plans de igualdade** sexan unha realidade de obrigado cumprimento.

- Fixar o **Salario Mínimo Interprofesional en 1.197 euros ao mes,** que é o 60% do salario medio do Estado español, tal como recomenda a Carta Social Europea. O importe da pensión mínima debe

ser equivalente ao do SMI. Así mesmo, eliminación do IPREM e substitución polo salario mínimo, como o indicador de renda para todo tipo de prestacións públicas.

- **Recoñecemento do dereito á xubilación ordinaria aos 65 anos.** O cálculo da base reguladora debe vir determinado polas bases de cotización dun período de dez anos da vida laboral. Eliminación das penalizacións e discriminacións no acceso á pensión das persoas empregadas a tempo parcial. Recuperación do dereito á xubilación parcial aos 61 anos como medida de acceso digno á xubilación e de creación de emprego.

3.- EMPREGO

- **Prohibición de simultanear** a aplicación dun **ERTE con outras medidas de recorte:** descolgues, modificación das condicións de traballo, mobilidade xeográfica, desregulación da xornada etc.

- As empresas, para poderse acoller ao ERTE, estarán ao día na actualización das revisións salariais, e deberán **completar até o 100% os salarios e manter a todo o persoal** temporal da empresa principal ou externas.

- **Garantir o cobro durante todo o ERTE do 70%** da base reguladora de cada persoa traballadora.

- **O tempo de desemprego por aplicación deste ERTE non se entenderá consumido** durante o ano 2022 e 2023.

- **Derrogar a reforma laboral de 2012 e aprobación dun novo procedemento para o despedimento colectivo:** reforzar o papel dos e das representantes sindicais nas negociacións, recuperar a autorización da autoridade laboral, superando a actual fase de unilateralismo empresarial, e devolverlle á Inspección de Traballo a súa competencia para emitir informe vinculante. Ampliación dos prazos do período de consultas a un mínimo dun mes.

4.- PROTECCIÓN SOCIAL E DEREITOS SOCIAIS

- Aprobación dunha **Renda de Inserción Laboral e Social**, en substitución do IMV, na contía do SMI, para as persoas maiores de 18 anos que non cobren ningún tipo de prestación económica, acompañada do seguimento dun itinerario persoal de orientación e formación profesional até a consecución dun posto de traballo no tempo máis breve posíbel.

O cobro desta renda de inserción non será incompatíbel con outras prestacións existentes (Risga, etc.) sempre que non se supere, sumadas todas, un importe igual ao salario mínimo interprofesional.

- A Xunta de Galiza e o Goberno español evitarán a **pobreza enerxética nos fogares**, acordando coas empresas subministradoras a **fixación de prezos sociais**. Así mesmo, asumirán o custo das facturas de gas e electricidade das persoas consumidoras vulnerábeis en risco de pobreza enerxética de acordo cos servizos sociais.

- **Prohibir os desafiuzamentos** de vivendas durante 2022 e 2023.

-A Xunta de Galiza deberá incrementar o parque público de vivendas sociais e facilitar as condicións de acceso para garantir o dereito a unha vivenda digna ás persoas vulnerábeis e sen recursos.

5.- ATENCIÓN ÁS PERSOAS

- **Creación dun Sistema Público Galego de Servizos de Atención ás Persoas** que aglutine as actuais residencias, centros de día, servizos de axuda no fogar e outros, de xeito que todas as galegas e galegos vexan cumprido o seu dereito a unha vida digna cando as súas circunstancias lles impidan poder facelo autonomamente.

-Aprobación urxente das medidas propostas na Iniciativa Lexislativa Popular para recuperar e fortalecer a Atención Primaria.

- Aumento significativo do **orçamento público destinado á atención á dependencia** e dotación suficiente de prazas públicas de centros de día e residencias até acadar a ratio recomendada pola OMS (cinco prazas por cada 100 persoas maiores de 65 anos).

- **Incremento das equipas de valoración** para reducir o tempo de resolución dos expedientes.

- **Exixencia do mantemento** e, de ser o caso, reapertura **dos servizos públicos e de oficinas bancarias** en todos os concellos, garantindo os horarios que permitan a atención persoal de forma presencial para calquera xestión.

6.- COMBUSTÍBEIS

- Fixación polo Goberno dun **prezo máximo da gasolina e do diésel** mentres non se establecen os prezos e non se avance nunha solución fiscal xusta, tomando como base o prezo medio nas gasolineiras ao 24 de febreiro de 2022.

7.- MOBILIDADE

- Reforzar os servizos de mobilidade **augmentando as frecuencias e ampliando os horarios** para facilitar os desprazamentos, reducir as exixencias para o acceso a maiores descontos e ampliar os traxectos gratuítos.

- Aplicar a **toda a rede ferroviaria galega a gratuidade e descontos** que se aplican en todos os territorios do Estado, mentres non teñamos en toda Galiza un servizo de proximidade.

8.- ALUGUEIRO E HIPOTECAS

- **Conxelación** das cláusulas de actualización das **rendas de alugueiro** en todos os conceptos durante o ano 2022 e 2023.

- **Conxelación das cláusulas nas hipotecas** variábeis e non aplicación das revisións pola suba dos tipo de xuro durante o ano 2022 e 2023.

9.- REFORMA FISCAL XUSTA

- Exixir o **pagamento dos tributos en Galiza** de todas as empresas que teñan centros de traballo en territorio galego.
- Reducir o tipo de gravame do **Imposto sobre o Valor Engadido (IVE)** naqueles produtos de primeira necesidade e incremental para os bens suntuarios.
- **Modificar a escala de gravame do IRPF**, elevando o limiar mínimo de ingresos para ter que presentar declaración. Eliminar a obrigatoriedade de facer a declaración no caso de dous pagadores se un deles é o SEPE. Aplicar un gravame progresivo maior aos ingresos superiores a 46.000 euros.
- Posta en marcha dun **imposto especial sobre os beneficios extraordinarios** da banca, os activos financeiros e o sector enerxético.
- **Eliminación dos privilexios** fiscais da igrexa e das SICAV.
- **Fin dos incentivos fiscais** a todos os plans de pensións.
- **Auditar a débeda pública e privada** para denunciar os contratos ilexítimos e liberar a carga financeira asociada.
- Garantir unha tributación mínima efectiva no **Imposto de Sociedades** do 15% en xeral; no caso de grandes empresas e sectores de hidrocarburos e banca, a tributación mínima situaríase no 18%. **Suprimir as bonificacións e deducións** do Imposto de Sociedades que na práctica están reducindo o devandito imposto efectivo a menos da metade do nominal.
- Revisión da **taxa Tobin, eliminando as exencións** e incrementando a porcentaxe que grava os movementos financeiros especulativos.
- Aprobación e aplicación inmediata dun **imposto que grave as empresas que prestan servizos dixitais**.
- **Prohibir** a contratación e as axudas públicas a empresas que teñen a sede en paraísos fiscais.
- **Eliminar** os fondos destinados á igrexa no IRPF.
- Plan de actuación para perseguir e **castigar a fraude e a evasión fiscal**. Supresión dos paraísos fiscais.

10.- PLAN GALEGO DE RECUPERACIÓN ECONÓMICA, INDUSTRIALIZACIÓN, CREACIÓN DE EMPREGO DIGNO E SERVIZOS PÚBLICOS, con medidas transversais e sectoriais, apostando en favor das forzas sociais galegas para o desenvolvemento deste proceso e non nas grandes empresas e nos fondos de investimento.